

1529 nus præficitur: ac Francisco Borbonio, cui ad instaurandas, atque augendas copias pecunia minime suppetebat, duodecim aureorum millia mutuo tributa sunt, ut foederatorum auctis viribus, Mediolani rursus oppugnatio tentaretur. Summa copiarum Reipublicæ octo peditum millia, Borbonii totidem, Sfortiæ tria millia erant. Galliæ Rex duorum millium Germanorum militum supplementum, atque octoginta aureorum millia se Borbonio missurum pollicebatur.

*Francisci
Regis propo-
siti ad Hi-
spanias in-
vadendas.*

Hoc exercitu adoriri Insulbrum caput placebat; eo expugnato, ad Genuam oppugnandam proficisci. Triremes viginti, quas diximus, Senatus Regi spondebat in Tyrrhenum mare navigaturas, ut Gallica adjuncta classe, Imperatori in Italiam proficiscenti obsisti posset: qua ex re totius belli eventus pendere haud dubie videbatur. Nam Carolo magnis terrestribus, ac maritimis viribus, ut rumor erat, in Italiam adveniienti impares ad sustinendum belli impetum foederatorum vires erant: illius præsentia Italorum Principum animos procul dubio spe illectos, aut timore deterritos, communi omnium salute neglecta, suis rebus consulturos. Quapropter illud præfertim hoc tempore providendum videbatur, ut si fieri posset, Cæsaris in Italiam iter vel remorarentur, vel impedirent. Neque ab ea sententia Francisci Regis animus abhorrebat; immo summa invadendæ Hispaniæ cupido inceserat præpotenti exercitu, cui ipse imperator præfesset, ad Pyreneos montes deducto; jamque sex Germanorum millia evocari jusserat, in spem erectus, fore, ut Carolus ne hostibus aditum in Hispanias præberet, consilia expeditionis Italiciæ prætermitteret. Verum hæc Regis sententia gravioribus difficultatibus involuta videbatur; aversis quippe Gallorum ab Italia viribus, haud exiguis periculis objectari res Italiciæ cernebantur, quæ hætenus illorum subsidiis innixæ steterant. A concepta opinione Regem avocare, ardoremque animo conceptum adversus Hispanos restinguere, tutum minime esse nonnulli rebantur; immo potius stimulos addendos, ut quo generoso quodam mentis impetu ferebatur, in id enixius incumberet: Contra aliis tutius esse videbatur, si in Italiam, in qua sedes belli erat, omnes conatus, ac spiritus impenderet: debellatis in ea hostibus, cuncta prospere, atque ad vota cessura. Inciderat in id tem-